

MAFI giat promosi MAHA 2022

Dijadual berlangsung pada 4 hingga 14 Ogos dengan jangkakan 100,000 pengunjung setiap hari

Oleh **TUAN BUQHAIRAH
TUAN MUHAMAD ADNAN
PUTRAJAYA**

Menjelang penganjuran Pameran Pertanian, Hortikultur dan Agropelancongan Malaysia (MAHA) 2022, Kementerian Pertanian dan Industri Makanan (MAFI) terus mempergiatkan aktiviti promosi.

Terbaharu, program *Street Attack* dianjurkan di pekarangan Wisma Tani bagi mempromosikan Larian MAHA 2022 pada 23 Julai ini.

Timbalan Ketua Setiausaha (Pembangunan) MAFI, Datuk Badrul Hisham Mohd berkata, pelbagai aktiviti promosi lain turut diatur di seluruh negara, antaranya *Street Attack* Zon Sabah dan Sarawak, aktiviti berbasikal dari



Peserta-peserta tidak melepaskan peluang berzumba sempena program promosi Larian MAHA 2022@ MAEPS, Serdang pada Rabu.

Bachok ke Kota Bharu, Kelantan, konvoi menunggang vespa bersama media dari Pontian, Johor ke Plaza Angsana dan iklan Mass Rapid bagi publisiti MAHA.

“Kita tahu MAHA kali ini ditunggu-tunggu selepas empat tahun tiada penganjuran akibat pandemik Covid-19,” katanya kepada pemberita selepas program *Street Attack* di Wisma Tani dekat

sini pada Rabu.

Menurutnya, kementerian mengambil langkah berjaga-jaga bagi memastikan penyebaran jangkitan Covid-19 tidak berlaku.

“Kapasiti lokasi tetap MAHA di Taman Ekspo Pertanian Malaysia Serdang (MAEPS) sebenarnya adalah tiga juga, namun kita hadkan kepada

sejuta pengunjung sepanjang 11 hari penganjurannya,” jelasnya.

Beliau berkata, sekiranya perlu kementerian akan menyediakan prosedur operasi standard (SOP) khusus sebagai langkah berjaga-jaga.

“Jawatankuasa kerja MAHA yang dipengerusikan oleh saya akan bermesyuarat pada Jumaat ini bagi melihat keperluan dan perkembangan penganjuran MAHA,” ujarnya.

Badrul berkata, seiring dengan perkembangan semasa, MAHA mengetengahkan kepentingan industri makanan selaras dengan temanya ‘Sekuriti Makanan Untuk Masa Depan’.

“Kita tidak lari daripada usaha MAFI untuk memberikan jaminan bekalan makanan kepada rakyat Malaysia,” tambahnya.

Ujarnya, antara kelainan pada MAHA 2022 adalah penglibatan semua kementerian.

“Semua menteri akan ada di MAHA setiap hari mengikut jadual yang telah ditetapkan,” katanya.

MAHA 2022 dijadualkan berlangsung pada 4 hingga 14 Ogos dengan jangkakan 100,000 pengunjung setiap hari.

Perdana Menteri, Datuk Seri Ismail Sabri Yaakob dijangka merasmikan ekspo tersebut pada 6 Ogos sempena Sambutan Hari Peladang.

MS 1514:2022 tingkat tahap kualiti, keselamatan makanan negara

SHAH ALAM - Kementerian Perdagangan Antarabangsa dan Industri (MITI) melalui Jabatan Standard Malaysia (JSM) telah membangunkan MS 1514:2022 *Good Manufacturing Practice (GMP)* bagi menyokong usaha menjamin makanan yang dihasilkan dan dipasarkan dalam negara ber-kualiti serta selamat.

JSM dalam kenyataan pada Rabu berkata, MS 1514:2022 yang diluluskan Menteri Kanan MITI, Datuk Seri Mohamed Azmin Ali pada 1 Jun lalu telah dikemas kini daripada edisi MS 1514:2009.

Menurutnya, MS 1514 menyediakan garis panduan dan kriteria penting yang perlu dipatuhi oleh pengeluar semasa pemrosesan makanan untuk menghasilkan produk selamat dimakan.

“Antaranya dari aspek fasiliti, pengoperasian, kebersihan dan pengangkutan.

“MS 1514 juga merupakan rujukan yang boleh diguna pakai oleh pengilang bagi memenuhi keperluan pelaksanaan program jaminan keselamatan makanan. Secara tidak langsung, ia dapat

meningkatkan kawalan keselamatan dan kualiti makanan di peringkat pengeluaran bagi tujuan pasaran tempatan, selain selari dengan standard antarabangsa,” katanya.

Tambah kenyataan itu lagi, kerajaan sentiasa mengambil berat dan berterusan berusaha menjamin keselamatan serta kesejahteraan rakyat termasuk memastikan makanan yang dikilangkan selamat dan berkualiti.

Jelasnya, selaras dengan perkembangan pesat industri makanan negara, penghasilan pelbagai produk makanan telah meningkat saban tahun.

“Ia menjadikan isu berkaitan keselamatan dan kualiti makanan menjadi semakin penting.

“Industri memainkan peranan penting bagi memastikan makanan yang dihasilkan selamat dan berkualiti sebagaimana diperuntukkan dalam Peraturan-Peraturan Makanan 1985 serta memenuhi keperluan Peraturan-Peraturan Kebersihan Makanan 2009 yang dikuatkuasakan oleh Kementerian Kesihatan Malaysia (KKM).



Seramai 130 peserta terdiri daripada pelbagai pihak berkepentingan seperti agensi kerajaan, badan pensijilan dan pemain industri makanan menghadiri seminar yang diadakan pada Rabu.

“Ia memperuntukkan semua premis yang terlibat dalam pengilangan makanan perlu melaksanakan program jaminan keselamatan makanan,” menurut kenyataan tersebut.

Tambah JSM, menyedari MS 1514 merupakan Malaysia Standard (MS) yang mendapat permintaan tinggi dan peng-

gunaan meluas dalam kalangan industri makanan, pihaknya dengan kerjasama Bahagian Keselamatan dan Kualiti Makanan (BKMM) dan KKM telah menganjurkan satu seminar.

“Seminar ini diadakan sekali dengan pelancaran MS 1514:2022 yang baru diterbitkan bagi memberi penjelasan

berkenaan klausa-klausa dan perubahan terkini serta mempromosi penggunaannya kepada umum.

“Diharap penganjuran seminar dapat meningkatkan bilangan syarikat yang mengguna pakai standard ini dan dipersijilkan untuk GMP,” menurut kenyataan tersebut.